

Cuerpo Policial Aruba ta informa:

Di 11 morto den trafico ta identifica

Relaciona cu e caso di hit & run fatal recientemente, famia a identifica e defunto cu ta un hende homber yama Ramon Rudolfo Croes, naci na Aruba ariba 28 juni 1958 di 66 aña di edad.

Lamentablemente el a bira e di 11 morto den un trafico fatal y door di un chauffeur cu a hit and run. Cuerpo di Polis ta haci un apelacion na e chauffeur di hit and run pa presenta na un di e wardanan di polis.



Hues lo duna sentencia dia 22 di januari 2025 den caso Flamingo

Dialuna ultimo tratamiento di caso Flamingo, den cual politico y candidato number uno riba lista di partido PPA Otmar Oduber ta sospechoso principal, a yega su fin. Dialuna mainta hues a suspende e caso y lo dicta sentencia den e caso dia 22 di januari 2025.

Dialuna mainta a toca turno na fiscal di Ministerio Publico (OM) pa presenta nan argumento respondiendo e argumentonan presenta pa defensa di e sospechosonan den caso Flamingo. Oduber na mas di un ocasion a expresa cu caso Flamingo ta simplemente un persecucion politico cu OM tin den su contra y ta sostiene su inocencia.

Segun e noticiero local Noticia Cla a informa, e fiscal di Ministerio Publico a insisti cu Oduber y su ekipo no mester considera e acto di OM como un persecucion contra e ex minister pasobra no tabatin presion politico y loke nan ta haciendo no ta politicamente motiva. Ademá e fiscal a sigui insisti cu no obstante e defensa di e sospechoso, OM ta para tras di cu tabatin trato preferencial. Ademá, e fiscal a indica cu no tabatin un maneho cu a ser publica di e excepcionan pa e asina yama young professionals door di cual nan ta remarca cu e tabata sigui duna preferencia na cierto personanan.

Segun e portal di noticia Oduber ta sigui insisti cu e no tabata mete y cu el a 'simplemente' coregi un fout cu a ser haci relaciona cu un tereno situa na Malmok. Pero for di punto di bista di OM, e coreccion aki no tabata un coreccion y a señala cu Odu-



ber tabata mete den e asuntonan aki, y cu ademá el a mete varios biaha y a haci esaki pafo di e persona encarga WC.

OM a indica tambe cu e proceso ta haci cu Consejo di Minister no por controla documentonan di e asina yama 'ambtenaar spirito.' OM a remarca tambe cu e emailnan cu e ekipo di e sospechoso a usa como defensa, no tabata muestra convincente y cu un declaracion comprometedor di e ambtenaar 'spirito' Phillips, ta un declaracion valido y por ser usa.

Pa loke ta trata e reaccion di defensa, e noticiero a indica, mescos cu OM a haci di nan banda ora cu defensa a presenta su argumentonan diabierna ultimo, a purba desbarata e ponencianan di OM y a bisa cu nan tin confianza cu e hues lo sa di usa e informacion presenta di e forma corecto. E abogado nan di Oduber a insisti cu nan ta keda para tras di nan punto cu e informacion y fuente presenta contra nan cliente no ta confiabel y cu tur cos, casi Flamingo, ta basa riba un

denuncia falso, mescos cu e contenido di e denuncia.

Relaciona cu e tema di terenonan, segun e portal, e defensa a muestra cu nan testigonan a confirma cu e maneho pa e young professionals haya tereno, ta cuadra. Ademá e defensa a bolbe enfoca riba e liña cortico cu tin entre comunidad y un minister y con tur cos ta funciona na Aruba. Nan a remarca con facil ta pa tin contacto cu un mandatario aki na Aruba compra cu otro pais, por ehemplo Hulanda y a subraya cu e contacto aki no ta nada malo of ilegal.

Defensa di Oduber a señala tambe e hecho, segun noticiero Noticia Cla a reporta, cu e Procurador General di e tempo ey, Sr. Van Dam, a hasta haci un peticion personal na ex minister Oduber e tempo ey pa agilisa e proceso di pone asfalt pa e caya unda e edificio nobo di Ministerio Publico tabata situa den Rumbastraat y cu Oduber a actua riba esaki locual a haci cu e peticion di e PG a ser atendi cune mas lihe.

Defensa a trata tambe e parti

di ambtenaar spirito na trabou y a señala cu e fout di OM ta cu nan no a haci un investigacion suficiente profundo pa por prueba cu e trahadonan en berdad no a traha.

E noticiero a informa cu basa riba e hecho cu no tin base huridico pa demanda e sospechoso, e defensa di Oduber haya cu mester declara nan cliente liber.

"Mi ta contento cu esaki a caba, cu e cos ki ta patras di lomba," Oduber a expresa durante un conferencia di prensa dialuna atardi despues cu tratamento di su caso a finalisa oficialmente y durante cual el enfatisa cu nada nobo bin dilanti y cu di tur e acusacionnan cu tabatin dos acusacion so a keda.

Ta preparando demanda cu ta bay haci contra Ministerio Publico, contra pais Aruba y segun e politico contra Hulanda tambe. El a indica den corte e comproba cu e rapportnan cu a ser traha pa BCI y TCI cu ta cay bou di RST cu ta cay bou Hulanda a tabata falso y pa e motibo ey Oduber a sigura cu e lo cana e pasonan necesario.

"E daño haci na mi persona durante e ultimo cinco aña y tres luna aki ta irreparable ta grandisimo, e daño cu a wordo haci na mi yiu homber y na cada un di otro personanan tambe cu a wordo hiba den e caso aki ta irreparable y bo por conta cu lo bin un daño y perhuicio contra tur e institutonan aki," Oduber a subraya.

Contestando pregunta di prensa tocante con e ta sinti tocante e cambio di fecha pa duna sentencia den e caso,

el a indica cu en berdad el a spera cu pa fin di december tin un sentencia, pero a warda tres siman mas, no contando e dianan di fiesta, no ta un problema.

Miembro di prensa a puntra kico ta su pensamiento den caso cu e sentencia ta na su favor y Ministerio Publico dicidi di apela e sentencia di hues. Oduber a splica den su contesta cu tur e puntonan cu Ministerio Publico a purba trece dilanti a ser bari for di mesa.

"Si ministerio publico djis bay durf di purba di bay den apelacion mi ta kere ta muestra caba loke e pueblo aki ta sintiendo tur caminda akinan na Aruba. E sentimento cu tin den pueblo ta cu e ta mas cu cla cu esaki ta un persecucion politico di parti di Ministerio Publico. Otmar ta cla pa sigui traha pa pueblo aworaki y esey ta loke nos ta pone nos dilanti y nos ta cla pa ehecuta nos plan, nos vision cu nos tin pa e proximo 25 aña," el a enfatisa.

